

Mahasiswa UMP jayakan program kemasyarakatan di Tioman

KUANTAN 20 Mei - Seramai 30 mahasiswa Universiti Malaysia Pahang (UMP) yang terdiri daripada ahli jawatankuasa Majlis Perwakilan Pelajar (MPP) universiti itu terlibat dalam program kemasyarakatan di Kampung Tekek, Pulau Tioman baru-baru ini.

Program sempena Kembara Radio Pahang FM bersama UMP itu mendapat kerjasama Perbadanan Kemajuan Tioman serta Jawatankuasa Kemajuan dan Keselamatan Kampung (JKKK) Kampung Tekek.

Ketibaan rombongan disambut meriah oleh Penghulu, Mohd. Nor Hidon, Ketua Kampung, Zulkarnaini A. Hamid serta penduduk kampung dengan diiringi paluan kompang.

Pengarah program, **Mohamad**

Amirul Anuar dari Fakulti Kejuruteraan Kimia dan Sumber Asli (FKKSA) berkata, program tersebut dimulakan dengan majlis penyerahan mahasiswa UMP yang menjadi anak angkat kepada 12 keluarga.

Katanya, turut diadakan kem motivasi kepada 78 pelajar di sekitar Pulau Tioman yang bakal menduduki peperiksaan Ujian Pencapaian Sekolah Rendah (UPSR) dan Sijil Pelajaran Malaysia (SPM).

"Selain itu, peserta turut menjayakan aktiviti di Sekolah Menengah Kebangsaan (SMK) Tekek dengan melukiskan mural di dinding sekolah untuk menceriakan persekitaran dan sebagai perangsang untuk pelajar lebih tekun dan bersemangat.

"Pada sebelah malam diadakan

program forum agama yang berlangsung di Dataran Tioman dan sambutan yang diberikan penduduk kampung sangat memuaskan," katanya di sini.

Sementara itu, Zulkarnaini berkata, pihaknya amat berbesar hati atas kunjungan UMP untuk bertemu dengan masyarakat desa ini serta memberikan suntikan semangat untuk berjaya kepada anak-anak di kampung itu.

"Untuk mendorong pelajar agar berjaya, kami bercadang mengadakan program bersama pihak sekolah dan Persatuan Ibu Bapa dan Guru (PIBG) untuk membawa para pelajar melawat UMP bagi merasai kehidupan sebenar di kampus," jelasnya.

Bagi calon SPM, **Nur Salwa Syahirah Magista**, 17, program sebegini

memberinya peluang mengenali lebih mendalam tentang UMP serta mengetahui teknik pembelajaran hasil perkongsian pengalaman dengan mahasiswa.

Pada program tersebut, turut diadakan pertandingan larian pantai, sukaneka rakyat, pertandingan memasak, kem motivasi, kenduri rakyat, pertandingan mewarna dan pelbagai aktiviti lagi dalam mempromosikan UMP kepada masyarakat luar.

Mahasiswa turut berpeluang mempersembahkan nyanyian dan tarian kebudayaan bagi memeriahkan lagi acara yang dirasmikan Pengerusi Jawatankuasa Pembangunan Wanita dan Keluarga, Komunikasi dan Multimedia negeri, Datuk Shahaniza Shamsuddin di Dataran Tioman.



SEBAHAGIAN daripada 78 pelajar yang menyertai kem motivasi di SMK Tekek sempena Program Kembara Radio Pahang FM bersama UMP di Kampung Tekek, Pulau Tioman, baru-baru ini.